

續
廣
博
物
志

續廣博物志

武進徐壽基桂珣編輯

羣動

兩間孕毓萬類冥蒙任天而化率性則從帝廷舞獸
王朝豢龍凡有飛走迄於昆蟲我司其券大造同功
志羣動第十三

淮南子羽嘉生飛龍飛龍生鳳皇鳳皇生鸞鳥鸞鳥生庶
鳥凡羽者生於庶鳥毛犢生應龍應龍生建馬建馬生
麒麟麒麟生庶獸凡毛者生於庶獸介鱗生蛟龍蛟龍
生鯢鯢生建邪建邪生庶魚凡鱗者生於庶魚介
潭生先龍先龍生元龜元龜生靈龜靈龜生庶龜凡介

者生於庶龜

鵠冠子鳳皇者鶉火之禽陽之精也麒麟者元枵之獸陰之精也

元覽歲星散爲麟玉衡散爲龜瑤光散爲象鹿斗星散爲犬彘樞精爲虎地精爲馬

元覽鹿角牛耳駝首鬼目蛇項蜃腹魚鱗虎掌鷹爪龍之狀也鴻前鴈後蛇頸魚尾鵝頸駕腮龍文龜背燕頤雞喙五色備舉鳳之狀也麕身牛尾狼頭馬足圓蹄肉角麟之狀也

宋書麒麟牡鳴曰遊聖牝鳴曰歸和夏鳴曰扶幼秋鳴曰養綏

瑞應圖麟之青曰鸞孤赤曰炎駒白曰索冥黑曰角端黃曰麒麟

山海經鳳首文曰德翼文曰順膺文曰仁背文曰義

抱朴子木行爲仁爲青鳳頭上青故曰戴仁也金行爲義爲白鳳纓白故曰纓義也火行爲禮爲赤鳳背赤故曰負禮也水行爲智爲黑鳳胸黑故曰向智也土行爲信爲黃鳳足下黃故曰蹈信也

說苑鳳晨鳴曰發明晝鳴曰保長飛鳴曰上翔集鳴曰歸昌

春秋潛潭巴鳳行鳴曰歸嬉止鳴曰提扶夜鳴曰善哉晨鳴曰賀世

宋書鳳鸞鳴曰滿昌昏鳴曰固常夜鳴曰保長

鸞與鳳形色相似照之以鏡不敢飛舞疑其影之爲鳳也
燉煌新錄虜蘇割刺在答魯之右大澤中高百尋石赭色
產椒大如彈丸然之香徹數十里每然椒則有鳥自雲
際翩躚五色名赭爾鳥蓋鳳皇種也昔漢武帝遣將軍
趙破奴逐匈奴得其椒以問東方朔朔曰此天仙椒也
塞外千里有之能致鳳武帝植之太液池至元帝時椒
生果有異鳥翔集

山海經憲翼之水多元龜鳥手虺尾名曰旋龜佩之不聾
伊水多三足龜食之無大疾已腫

宋書神龜三百歲游藻葉之上三千歲游卷耳之上

記曰能得名龜者財物歸之家必大富一曰北斗龜二曰南辰龜三曰五星龜四曰八風龜五曰二十八宿龜六曰日月龜七曰九州龜八曰玉龜

拾遺記星池之中有神龜八足六眼背負七星日月八方之圖腹有五嶽四瀆之象時出石上望之煌煌如列星述異記數過國獻能言龜帝從東方朔之言盛以青玉之匣飲以承柱之露置於通風臺問其言無不中

神仙傳葛玄指龜使舞

蘄州出小龜遍身皆綠毛可玩或以尋常小龜用生薑汁塗之數次亦生綠毛

龜腸屬首其任督脉皆通故能嚙氣終歲不食亦不死參

同契及道書言人能如是即可長生又言去龜之足與腸胃但於任督脉無損壞猶可不死

龜之蟄藏口中必含乾土凡蟄者皆如此蛇所含者作腥氣犬食之則瘋

龜溺磨墨書之能入木三分以塗面洗終不去郭璞云龜得鏡則失溺又有傳取溺之法縛置沙鉢中更以一鉢蓋之微開一孔使可進烟用樟木焚之外更覆以大缸卽溺或又云以紙條燃火炙其溺處卽溺

廣雅有鱗曰蛟龍有翼曰應龍有角曰龍巨龍無角曰虬龍一云有角蚪龍無角螭龍

酉陽雜俎龍頭上有一物如博山形名尺木龍無尺木不

能昇天

雜俎角浪凹峭上壯下殺龍之雄也直鼻圓鼠薄鱗壯尾龍之雌也

廣雅龍生九子蒲牢好鳴

鐘鈕

囚牢好音

樂器

嘲風好險

殿角

睚眦好殺

刀頭

負屨好文

碑旁

狻猊好訟

之獸

狻猊

狻猊好坐

佛座

霸下好負重

碑座

一說龍生九種各具一

體蛟能起水鼉能知時負碑者曰屬鼉性喜負重在鐘

者曰蒲牢善鳴在屋脊者曰鴟吻喜望遠而登高在獄

者曰犴狴能固守在劍者曰睚眦性喜殺鯨鯢能攻堅

螭龍喜文采

廣雅百歲之虬斷而復續

舊說天罰乖龍必割其耳血墜於樹輒化爲李

並見羣芳譜

又小

說載有女子食樹上李大異於常者遂產小龍殆卽龍耳所化也

龍性淫能與諸物交遂產異物交於蟻而生蛟俗云螞蟻蛟是也爲害尤烈與豕交而產象與牛交而產麟或云龍精滴物皆能透過惟遇石則止牛豕食之則生麟象不必交也馬之有龍駒亦爲龍種

抱朴子人食燕肉則涉江海必爲龍所食考之說文繫傳云龍喜食燕蓋人食其肉而氣味猶在龍故食之也龍性畏蠟廣記梁武帝使人用蠟塗身而捧炙燕入龍宮以求珠

龍性喜文凡行江湖遇有龍風幾至覆舟者急以字紙焚之而揚其灰風當頓息

蜃戶入海取珠皆身帶金器云黃金入水映水有光遠望之皆可見故無蛟龍之害

雞四距而重翼者龍也殺之必遭雷殛鯉魚之瞽眼者亦龍所化也雞眼上皮下覆者名怒睛雞爲鳳種能治蜈蚣與蝎子精

宋書獸之瑞者三角獸先王法度修則至一角獸天下平一則至六足獸王者謀及衆庶則至比肩獸王者德及矜寡則至銀鹿刑罰得共民不爲非則至天鹿者純靈之獸也五色光耀洞明王者道備則至角端者日行萬

八千里又曉四夷之語明君聖主在位明達方外之事
則奉書而至周印者神獸之名星宿之變化王者德盛
則至澤獸能言知萬物之情賢君明德幽遠則來黃帝
時有之澤卽白 餘者幽隱之獸明王在位則來辟除災害
拾遺記瀛州有獸名嗅石其狀如麒麟不食生卉不飲濁
水嗅石則知有金玉吹石則開金沙寶璞粲而可用又
有獸名嗽月形似豹飲金泉之液食銀石之髓此獸夜
噴白氣其光如月可照數十畝軒輳之世獲焉

元池子說林少皞出野遇獸牛首而人身驚告皇娥娥曰
昔余聞之帝子牛首人身其名師親見之者百福胥臻
帝乃釋然

集微弦超入泰山遇一物如獐頭若婦人鬢髻簪珥悉具
歸語智瓊瓊曰此方輝也五百年一見見者壽弦超果
二百餘歲

山海經獸之異者柎陽之山有獸狀如馬而白首文如虎
而赤尾其鳴如謠名曰鹿蜀佩之宜子孫譙水有獸狀
如貍而赤豪音如榴榴名曰孟槐陰山有獸狀如狸或作
豹白首音如榴榴或作貓貓名曰天狗翼望之山有獸如狸
一目三尾音如奪百聲名曰謹是三者皆禦凶豈爰之
山有獸如狸而有髦其名曰類自爲牝牡食者不妬基
山有獸如羊九尾四耳目在背名曰騭訖佩之不畏中
曲之山有獸如馬而白身黑尾一角虎牙爪音如鼓名

曰駁食虎豹可禦兵帶山有獸如馬一角名曰臚疏可
辟火豺山有獸狀如夸父而彘毛音如呼空桑之山有
獸如牛而虎文音如欽名曰軫軫剡山有獸狀如彘人
面黃身而赤尾名曰合窳音如嬰兒三者見皆主大水
始逢之山有獸如狐而有翼音如鴻雁名曰獬獬見則
大旱欽山有獸狀如豚  牙名曰當康其鳴自呌見
則大穰泰山有獸如牛而白首一目而虵尾名曰蜚見
則大疫虵山有獸如狐而白尾長耳名曰狔狼歷石之
山有獸如狸白首虎爪名曰梁倚常之山有獸如鼯鼠
白耳白喙名曰狙如三者皆主大兵豐山有獸狀如猿
赤目赤喙黃身名曰雍和耿山有獸如狐而魚翼名曰

朱孺見則國有大恐鮮山有獸狀如膜犬赤喙赤目白
尾名曰狻郎見則其邑有火甘棗之山有獸其狀如猼
音鼠而文題名曰難食之已漚金星之山多天嬰狀如
龍骨可已瘞霍山有獸狀如狸白尾有鬣名曰𪚩𪚩養
之可以已憂依軫之山有獸狀如犬虎爪有甲名曰獬
善馱牟食者不風昆吾之山有獸狀如彘有角音如號
名曰𪚩𪚩食之不昧陽山有獸如牛而赤尾名曰領胡
食之已狂天帝之山有獸狀如狗名曰谿邊席其皮者
不蠱青邱之山有獸如狐而九尾音如嬰兒能食人食
之者不蠱招搖之山有獸如禺而白名曰狺狺食之者
善走

說文駟騶野馬也出北海形似鹿蜀

集韻牴牾二獸名秉心甚靈蓋忠直獸也今華表頂上者是

鄭氏姻禮謁文讀含利爲獸獸而能謙禮義乃食口無譏
僇

南越州志昔有懶婦睡機上姑怒之逐走投水化爲獸因
名懶婦一枚可得脂三四斛然之照紡績則暗照歌舞
則明

張揖曰飛遽天上神獸也鹿頭而龍身

釋氏書言以獅子筋爲絃鼓之眾絃皆絕又唐集賢校理
張希復言舊有獅子尾拂夏月蠅蚋不敢集其上

以牛羊驢馬諸乳置器中更以獅子溺一滴投之悉化爲水

獅子吼如衆鉦齊鳴百獸皆戰栗伏地不能起故虎聞鳴鉦則驚怖而走以爲獅子聲也東哲發蒙記云獅子畏鈎戟利碼竇職方外紀言利未亞多獅子畏雄雞車輪之聲又外域產獅子處房屋輒爲所毀居民苦其爲害者輒以巨礮擊殺之

李肇國史補虎四指者天虎也五指者人虎也

酉陽雜俎虎交而月暈

斗運樞四方煩擾小民失恩虎銜魚又小說載虎尾氣腥能入水釣大魚食之

虎有威骨帶之者人咸懾服形如乙字者是也春月在前左足夏月在前右足秋在後左冬在後右

人爲虎食則爲虎俛供虎役使必得一人代之乃免遇獵者所設窩弓輒先發之故除虎害必先制俛鬼俛喜食酸味以桑葚青梅等物散置路間俛食之則醉一云俛喜食青螺以數斗徧撒山谷俛見之貪剔螺肉則忘爲虎護或以鐵蒺藜納犬豕腹中虎食之當洞腹而死

說鈴載虎之舉動皆可先知左耳動則右足將起急以鐵錐擊其左足右耳動則左足將起擊其右足夫之力足以制之

山行者衣白衣則虎不食以白爲西方金也

夜行山澤中執香一炷虎豹望之皆却走

虎攫犬彘去急春空確數十聲或以磚塞竈門或以木覆篩掩確口虎卽齒酸得犬彘不能食

虎畏尖物不越籬畏日與梟同畏火愛毛也不棲高林畏枝上雀糞爛其毛也行人張蓋而虎不犯者虎疑也凡虎饑則難犯飽則易制

趙德麟侯鯖錄載均房山中作枯木膠傅布給虎至斃又本草八月後蟬與虎鬪而虎敗非力不足智有所窮也刺蝟能躍入虎耳故虎最畏之一云刺蝟見虎則坦示其腹虎以舌舐之乃爲所困至洞喉而死

狼畏圓物人若遇狼解帶作圈狼輒去狼腸直故邊塞以

狼矢爲烟鳴則後竅皆沸

狼足前長後短狼足前短後長狼可獨行狼非狼負則不能行

豺爲狼屬形與狗似然見狗則跪羅願曰狗是其舅故見則如此又狗不食蛙肉俗云蛙爲狗之舅也

羊畏狼淮南子曰狼皮在戶則羊不敢入

釋氏書言羚羊掛角無跡可求古言云羚羊無些子氣味虎豹再尋他不着蓋羚羊夜卽掛角而懸身於樹以避虎害

虎鬚象尾皆可剔牙使齒不損拔虎鬚須用字紙及麻布裹手否則拔終不出藏之者亦以字紙及麻布裹之或

用糲米數粒不然則走象尾亦須用敗草數莖藏之
象鼻端有爪拾針無異磁石

象一身具十二辰之肉膳無定處隨所值之月而附之如
正月寅膳在虎肉二月卯則在兔肉

騰越州志蠻夷之國佈巨象爲陣不可當也須誘入隘口
預於地內埋酒百甕或更潑酒地上象聞酒香卽止不
行其耳後有穴薄僅如紙以長刀刺之則驚而走

酉陽雜俎人子簾產深山中紅色蔓端有刺焚之可以集
象

拾遺記因埤國獻五足獸使者言東方有解形之民使頭
飛於南海左手飛於東山右手飛於西澤獸是其手所

化

字林狔獸無前足似虎而黑

抱鶚目在腋下龍馬翼在骼鯨翼在膊乘黃角在背蜉蝣
蛞蝓翅在甲下騶虞尾長於身喙木舌長於味狻猊尾
大於斗鵠鷄胡大於囊

商子書策篇麗麗臣臣獨足獸也行常不止

神異經崑崙西有獸其狀如犬有兩目而不見有兩耳而
不聞有腹而無五臟有腸直而不旋食而經過人有德
行而往抵觸之人有凶惡而往憑依之天使其然名曰
混沌一名無耳一名無心空居無常咋尾圓轉向天而
笑

酉陽雜俎獬豸見關不直者觸之窮奇見關不直者煦之
故君子以獬豸爲冠小人以窮奇爲名又宛委餘編獬
豸名神羊窮奇名神狗說文獬豸春夏處水澤秋冬處
松柏

神異經西北有獸其狀如虎有翼能飛食人知人言語聞
人鬪輒食直者聞人忠信輒食其鼻聞人惡逆不善輒
殺獸往饋之名曰窮奇

檮杌一名難訓又周語商之興也檮杌次於丕山則以檮
杌又爲瑞獸之名

乘雅載紫棟樹子云獬豸食之火獸也喜其潔蛟龍畏之
水蟲也激其怒又風俗通獬豸食棟

呂氏春秋周鼎饕餮有首無身食人未咽害及其身

神異經西南荒中出訛獸狀如菟人面能言常欺人言東而西言惡而善肉美食之言不真矣

淮南萬畢術阿羊九頭而更食國亂乃出

述異記南海有風生獸刀斧不能傷用巨木捶殺之頃刻而生以石菖蒲塞其鼻則死取腦和酒飲之壽至五百歲

常璩華陽國志滇南建甯郡有貊獸能食鐵凡鐵遇之皆朽如腐投其溺中逾時卽化

狒狒飲其血可以見鬼力負千斤

炙轂子罔象之獸喜食死人腦而最畏柏樹故墓道間恒

植柏

異物類苑山都人面黑長身有尾踵見人輒笑則上唇掩目乘此時以長釘釘之

雷子雷屬也頭似烏喙爲火土之精或云卽道家所稱律令以其飛行倏忽能追已發之雷故雷部用之雷擊物時恒隨雷下如遇穢物卽不能飛產雷州土人恒於其蟄時掘而食之但不可言雷或犯之必遭雷擊

雉與斑蛇交卽生蛟筍亦可食閩地多有之

本草蜃蛟屬也狀似蛇而大有角如龍狀紅鬣腰以下鱗盡逆食燕子噓氣成樓臺城郭之狀將雨卽見名蜃樓亦曰海市其脂和製作燭香凡百步煙中亦有樓臺形

坟墓之間冬無積雪者下有潛蛟

蛟畏鉦鼓聲月令言伐蛟蓋用鐘鼓以伐之也

山海經鮮山多鳴虵其狀如虵而四翼音如磬見則其邑大旱伊山多花虵狀如人面豺身鳥翼音如叱呼見則其邑大水幽都之山浴水出焉是有大虵赤首白身音如牛見則其邑大旱泰華山有虵名肥遺六足四翼見則天下大旱

遺教經黑虵者睡蛇也

顏氏家訓吾初讀莊子蟪蛄二首韓非子曰蟲有蟪者一身兩口爭食相齟遂相殺按爾雅諸書蚕蛹名蟪又非二首兩口貪害之物後見古今字詒始知古之虺字也

泰山有赤龍潭生赤鱗魚味美如鱸骨經曰曬則化爲水

蓋純陰之所生也

壽基昔嘗食之

郭璞鼈三足曰能龜三足曰賁

山海經從水中多三足鼈枝尾食之無蠱疫

白澤圖一足鼈池精名髮項

淮南子越人得髯蛇以爲上肴中國得而棄之無用

鼈名土龍能橫飛不能上騰

龍聽以角其耳聾也蛇亦聾耳見談薈又周禮注牛耳無
竅盟於神故以不聽爲戒談圃云王荊公解周禮言取
其順聽不知牛本以鼻聽其耳固不聰也又按淮南子
云夫馬爲聾蟲據此則牛馬皆聾於耳

邪希有鹿兩頭而肉且干一肉者爲天鹿兩肉者爲辟邪
道書有五頭鹿其肉亦干

京房易傳興繇役奪民時厥妖牛生五足搜神記秦文王
時有之

搜神記漢景帝中六年梁孝王田北山有獻牛足出背上
者劉向以爲牛禍下奸上之象也

春秋考異郵熒惑不明雉生兔

春秋元命苞君失德則地吐泉魚啣兔

述異記殷紂時龜生毛兔生角是甲兵將興之兆

搜神記漢文帝後元五年齊雍城門外有狗生角京房易
傳執政失下將害之厥妖狗生角又漢景帝三年邯鄲

有狗與彘交五行志以爲犬兵革失衆之占豕北方匈奴之象又京房易傳曰夫婦不嚴厥妖狗與豕交

山海經金門之山有赤犬名曰天犬下則天下兵起

犬與羊交生子無角又述異記羊而不角呼蛟羊按說文驢父馬母生騾馬父驢母生馱馱驢父牛母生駝駝匈奴傳所謂奇畜也

酉陽雜俎徧徂以猿爲雌蜥蜴以魚爲偶又束皙發蒙記獼以猿爲婦

龍卵生而風化蟲氣化而卵生雀浴沙而交鼃隔津而望龜龜相顧神交也鶴鶴相唳氣交也又變化論曰鷺目成而受胎鶴影接而懷卵鴛鴦交頸野鶴傳枝又舊說

禽獸之不再交者虎鴛鴦瑋瑁也是鴛鴦又未嘗不交矣

拾遺記有鳥名鴻鵠色似鴻形如禿鶩腹內無腸羽翮附骨而生無皮肉雄雌相眄則生產

異物志靈狸一體自爲夫婦故能媚人

唐韻注有鳥名鷄離能自爲牝牡

郭璞曰大腰無雄龜鼈類也與蛇通則孕細腰無雌蜂類也祝桑蟲成子按此言蜂類蓋指果蠃

子夏言物生之數人十月生馬十二月生狗三月生豕四月生猿五月生鹿六月生虎七月生蟲八月化餘亦各從其類

獸以吐而生者兔鳥以吐而生者鷦鷯蟲以吐而生者蝻
蝻

蝮蛇生圻副母腹寒蠋生圻裂母背

逐月有子者鵠四時有子者雀平化者鷺以夏蚌以秋

李肇國史補引荅谿子曰八竅者卵九竅者胎推遷之變
化也蝦蟆爲鵲蠶蛹爲蛾蚯蚓爲百合火足鳥之根爲
蟾蜍久竹生蛭老獮爲猿陶蒸之變化也仁而爲暴聖
而爲狂雌雞爲雄男子爲女人爲蛇爲虎耗亂之變也
是必生化而後氣化氣化而後形化惟道德者窮焉

伯勞爲伯奇所化蟬爲齊女所化蜉蝣爲彭越之醢所化
精衛爲炎帝之女所化杜宇爲蜀帝所化又古今異傳

啄木爲雷公採藥吏所化崔豹古今注縊女蟲爲東郭

姜所化

異苑所載同

螭螭爲有曹氏之子所化

酉陽雜俎號郡有蟲名謝豹謝豹人也抱耻死其魄爲蟲潛行地中羞見人掘出之猶以足覆面作忍耻狀又述異記楚莊王宮人化爲野蛾古今注樂浪尉化爲魚不獨人之化虎化狼也

腐草爲螢敗瓜爲蜣枯楊爲蟬無知而有知也蜣螂之變爲蜩蟬螟蛉之變爲果蠃蝦蟇之變爲蜻蛉無翅而有翅也鯉化爲龍由凡而神也蛇跌爲鼈由靈而蠢也鱗魚變虎易鱗而走也田鼠爲鴽易走而飛也慈烏變鵲易飛而鱗也

搜神記腐草之爲螢也朽葦之爲葦也稻之爲蜚也麥之爲蝴蝶也羽翼生焉眼目成焉心智在焉此自無知化爲有知而氣易也鶴之爲麀也葦之爲蝦也不失其血氣而形性變也

淮南子蝦蟇爲鶉水蠆爲螻蛄皆生非其類唯聖人知其化

說文蠖爲蚊黃魚爲鰐鰕汝魚之斑者爲鹿

古今注紺繡如蜻蛉七月羣飛爲蝦所化

西施舌爲海燕所化久則復化爲燕又瑯環記蚊入水皆化小魚魚不皆魚子生也

蚺蛟能化鵠鶉見洪邁夷堅志又岫嶠神書以刺蝟縛置

瓜中埋積廁內四十九日後卽成安鷄鳥

抱朴子江中魚化爲蝗而食五穀者百歲爲鼠

蟻蠓爲人身汗垢所化蜒蚰爲人口中涎沫所化北方地
乾燥多塵土故蜒蚰絕少

淮南子蠶食而不飲二十二日而化蟬飲而不食三十日
而蛻蜉蜉不食不飲二日而死

搜神記序千歲之雉入海爲蜃百年之雀入江爲蛤千歲
之龜能與人語千歲之狐起爲美女千歲之蛇斷而復
續千歲之鼠而能相卜

述異記漢中山有虎生肉道家云虎千年則牙蛻而肉生
抱朴子鼠壽三百歲滿一百歲者則色白善憑人而卜名

曰仲能知一年中吉凶及千里外事

元覽千年之狐姓趙姓張五百年狐姓白姓康

烏千歲而五色蟾蜍萬歲而丹額又抱朴子千歲之狐豫知將來千歲之狸變爲好女千歲之猿變爲老人

淮南子虵無足而行魚無耳而聽蟬無口而鳴有然之者也又抱朴子鼃無耳而善聽蚓無口而揚聲

蟬無口魚無耳馬無胆獬無髓羊無神蚓無筋泥無骨鵠無舌兔無脾蠶螢無胃猩狒無尾鱗蜃無腸蛤蜊無臟鰕鼠無尾蜉蝣無鼻鳥無肺虎無小腸豹無前足一曰鳥無胃獐兔俱無胆鰕鰭魚無腸雞無肺蚓無心蛤蜊無血

豕剛鬣而喜雨羊柔毛而畏露蛤蜊候風雲能以其殼飛
鰓遇風波能以其鬚石

淮南子鵲巢知風之所起鰌穴知水之高下暉日知晏陰
諧知雨

龍不見石魚不見水鬼不見地羊不見雨狗不見星

鸛鵒不能過河而北鸛鵒不能過河而南又淮南子鸛鵒
不過濟獬渡汶則死

象行先以鼻柱地鸚鵡行先以口啄地

元覽龍之鱗以九數九陽也鯉之鱗以六數六陰也

馬陽之屬故起先前足卧先後足牛陰之屬故起先後足
卧先前足鵲夕瞽鵲晝盲

東方朔傳武帝問朔何知鳥之雌雄對曰雄左翼加右聲
高雌右翼加左聲小又燒毛納水中沈者雄浮者雌鹿
初生鼻邊有缺者雄鶴初生眼傍有紅點者雄蜂尾有
歧者雌銳者雄鴛雄者班雌者黃猿雄者黑雌者黃雄
赤爲翡雌青爲翠鴿雌乘雄鶯雌負雄蟋蟀雙尾者雄
三尾者雌

陽鳥之飛頭伸而足縮陰鳥之飛頭縮而足伸物食者長
喙穀食者短喙山禽尾長喙銳而善喙水禽尾短喙圓
而善喙長脚者多立短脚者多伏尾近脚者好步脚近
臆者好躑

鳥左顧則怒作右盼則喜生禽經陸鳥曰棲水鳥曰宿獨

鳥曰止眾鳥曰集

蟬史吳越有異鳥極大四目三足飛鳴山林羅平乃其聲也占曰國主有兵人相食

山海經鳥之異者復州之山有鳥如鵲一足彘尾名曰跂

踵見則大疫

姓音

遇之鳥狀如翟而赤食魚音如錄蠻

蠻之鳥狀如鳬一翼一目相得乃飛二者皆主大水鍾

山有鳥狀如鴟赤足而直喙黃文而白首其音如鵠名

曰鵠鳥又有鳥如鵠而人面蜚身犬尾其鳴自號二者

皆主旱章莪之山有鳥如鶴一足赤文青質而曰喙名

曰畢方見則有火鹿臺之山有鳥如雄雞而人面名曰

鳬侯見則有兵符愚之山有鳥名鵠狀如翠而赤喙峴

山有鳥名竊脂狀如臯白首而赤身皆可衛火翠山有
鳥名鷗狀如鵲赤黑兩首四足小華之山有鳥名赤鷩
黃頭綠尾中有赤毛五陽之山有鳥名馭餘狀如鳥而
赤足皆可禦火鷩鷩之鳥狀如雞三首六目六足三翼
食之無卧青丘之山有鳥名灌灌狀如鳩佩之不惑英
山有鳥名肥遺狀如鵪黃身而赤喙食之已癘殺蟲上
申之山有鳥名當扈狀如雉能以髯飛食之不眴目鵪
鷩之鳥狀如鳥五采而赤文自爲牝牡食之不疽鵪鳥
羣居而朋飛其鳴自呼食之已風白鵪之鳥狀如雉而
文首白翼黃足食之已盜痛已痢鷩鷩之鳥狀如鳥人
面宵飛而晝伏食之已暍鷩鷩之鳥狀如鳥白首而青

身黃足其鳴自訖食之不饑軒轅之山有黃鳥狀如梟而白首其鳴自訖食之不如鹿山有鳥名鵠鵠狀如山雞而長尾赤如丹火而青喙服之不昧踰次之山有鳥名橐蜚狀如梟人面一足冬見夏蟄服之不畏雷鵠鳥狀如鳬青身而赤目赤尾食之宜子梁渠之山有鳥名鵠狀如夸父四翼一目犬尾其音如鵠食之已腹痛止術治洞也天帝之山有鳥名櫟狀如鵠黑文而赤翁食之已痔

抱朴子石脩九首畢方人面

抱朴子千歲之鳥萬歲之禽皆人面而鳥身壽亦如其名神異經不孝鳥狀如人身犬毛有齒猪牙額上有文曰不

孝口下有文曰不慈胸上有文曰不道左脇有文曰愛
夫右脇有文曰憐婦

神異經奇肱有兩頭之鳥互人有六首之鴈

韓詩孔子與子夏渡江見鳥而異之人莫能名孔子曰鴈
嘗聞河上人歌云鴈兮鴈兮逆毛衰兮一身九尾長兮
方言鴈自關而東謂之鴈鵠南楚之外謂之鵠或謂之
鴈鴈

禽經鸚鵡摩其背而瘖鴈鵠剪其舌而語

淮南子萬畢術寒臯斷舌使語寒臯一名鸚鵡也伯勞守金人不

取註收伯勞血以塗金人不敢取非也按伯勞之血能
使金黯人自不識之耳

天中記鶴左右腳裏第一脂名兵爪

爾雅翼鵠卽是鶴音之轉後人以鵠名頗著謂鶴之外別有所謂鵠故埤雅既有鶴又有鵠非也

爾雅翼鴉有隱巢故鷺鳥莫能見鶴有長水石能於巢中養魚而水不涸

九章筭術五雀六燕飛集衡衡適平

杜鵑相推而鳴先鳴者吐血死

竹雞產安徽寧國府及宣寧涇太諸山鄉皆有之鳴音似泥滑滑竹木之蟲聞之皆化爲水

浙江無狼廣東無兔蜀中無鵠北地無蜈蚣江南無蝎此地氣使然與橘過淮爲枳同一理也

墨子蝦蟇日夜鳴而人不聽之偶閱香祖筆記載濟南明湖蛙不鳴濰縣無蟬或閱數年間聞其聲則置酒競往賞之以爲異事

雪蛆可愈積熱老學庵筆記引嘉祐雜誌云雪蛆及至於蜀乃知此物實出茂州

柳崖外編滇南產竹鼠亦名我有油生叢竹中食竹根形類貓而小毛灰色可爲裘稍肥則自鳴我有油人以木板壓之取其油遂不復叫必得有油再叫如前

晉有地鼠諺名犵狁巴生田間毛蒼而有黑文牝牝作穴秋成時競銜黍穀儲穴中爲禦冬計或至數斗大寒霜雪遍野牝給牡出穴潛自內坯之牡歸無所潛野窟中

食草根延餘命抵春牝自啟戶卽遇前牡若不復識另擇牡同穴食餘糧焉

異物志大秦國北有羊子生土中候其欲萌爲垣繞之其臍連地不可以刀截擊鼓驚之而絕因跳鳴食草又雙槐歲鈔西域人殺羊而食埋其脰骨舉杵堅築人之羔從脰骨而生臍未斷時馬傍踏振之卽跳躍而起又西使記西海出蠶種羊羊臍種土中溉以水聞雷而生至秋可食臍內復有種

豪猪脊間有勁物如矢人偶觸之則躍然出虎亦畏之逮其矢發不遠然後圍而擊之矢長四五寸婦女或作釵飾之用

駝伏於地而腹猶離地前可視後者謂之明駝日行千里
又常駝皆雙峯單峯者千里駝也單峯爲食品之珍
武備志載相馬法前腿欲直後腿欲曲而開似琵琶形汗
溝欲深尾端欲方蹄如覆鐘欲上收而下放耳內有毛
者良馬也日行五百里後足所踏欲過前足俗謂之過
竈竈前蹄兩眼也癸辛雜志馬之壯者其眼光照人見
全身中年者見半身老馬則見人面而已

齊民要術載相馬不藏法肝欲得小耳小則肝小肝小識
人意肺欲得大鼻大則肺大肺大則能奔心欲得大目
大則心大心大則猛利不驚目四滿則朝暮健腎欲得
小腸欲得厚目長腸厚則腹下廣方而平脾欲得小膝

腹小則脾小脾小則易養望之大就之小筋馬也望之

小就之大肉馬也皆可乘致致瘦欲得見其肉

謂前肩守肉

致肥欲得見其骨

骨謂頭顱

馬龍顱突目平脊大腹脰重有

肉此三事備者亦千里馬也水火欲得分

水火在鼻上兩孔間

唇欲急而方口中欲得紅而有光此馬千里馬上齒欲

鈎鈎則壽下齒欲鋸鋸則怒頷下欲深下唇欲緩牙欲

去齒一寸則四百里牙劍鋒則千里嗣骨欲廉如織杼

而濶又欲長

頰裏上近前也

目欲滿而澤眶欲小上欲弓曲下

欲直素中欲廉南張

素鼻孔上

陰中欲得平

股主人欲小

上近

陽裏欲高則怒

股中上之主人

額欲方而平八肉欲大而

前也

明耳玄中欲深

耳下近牙

耳欲小而銳如削筒相去欲促懸

欲戴中骨高二寸中骨也易骨欲直下眼也頰欲開赤長

膺下欲廣一尺以上名曰挾一作扶尺能久走鞅欲方前頰

喉欲曲而深胸欲直而出前向鳧間欲開望視之如雙

鳧頸骨欲大肉次之髻欲極而厚且折季毛欲長多覆

肝肺無病髮後背欲短而方脊欲大而抗胸筋欲大夾脊

也筋飛鳧見者怒筋也三府欲齊兩髀及尻欲頽而方尾

欲減本欲大脇肋欲大而窪名曰上渠能久走龍翅欲

廣而長升肉欲大而明外輔肉欲大而明前腸欲

充腔小腔季肋欲張短懸薄欲厚而緩腔虎口欲開股

腹下欲平滿善走名曰下渠日三百里陽肉欲上而高

起近前髀欲廣厚汗溝欲深明直肉欲方能久走後

翰一作鼠

鼠欲方

直肉下也

胸肉欲急

髀裏也

間筋欲急短而減

善細走

下筋鼠

機骨欲舉上曲如懸匡馬頭欲高距骨欲

出前間骨欲出前後目

外亮臨蹄骨也

附蟬欲大前後目

夜股

欲薄而博善能走

後髀前骨

臂欲長而膝本欲起有力

前膝上

前句肘後欲開能走膝欲方而庫髀骨欲短兩肩骨欲深

名曰芙蕖怒蹄欲厚三寸硬如石下欲深而明其後開

如鷗翼能久走

齊民要術相牛法牛岐胡有壽眼去角近行駛眼欲得大

眼中有白脉

者最快二軌齊者快

二軌從鼻至髀為前軌甲至髀為後

軌頸欲長且大快壁堂欲得濶

壁堂

而正也莖欲得小膺庭欲得廣

膺庭

天關欲得成

天關

脊接骨也。僂骨欲得垂。僂骨脊骨中夾欲得下也。洞胡無壽。洞胡從頭至臆也。旋

毛在珠淵無壽。珠淵在眼下也。上池有亂毛起妨主。上池兩角中一日載

也。倚脚不正有勞病。角冷有病毛拳有病毛欲得短密

若長疎不耐寒氣耳多長毛不耐寒熱單簪無力有生

廊卽決者有大勞病。尿射前脚者快直下者不快。亂曉

者觚人後脚曲及直並是好相直。尤勝進不甚直退不

甚曲爲下行欲得似羊行頭不用多肉。臀欲方尾不用

至地至地少力尾上毛少骨多者有力。膝上縛肉欲得

硬角欲得細橫豎無在大身欲得促形欲得如卷。卷者其形

也。揷頸欲得高一曰體欲得緊大膝疎肋難飼。龍突曰

好跳。又云不能行也。鼻如鏡鼻難牽口方易飼。蘭株欲得大。蘭株

尾豪筋欲得成就後橫筋豐岳欲得大豐岳膝也蹄欲得

豎豎如羊角垂星欲得有努肉垂星蹄上有肉力柱欲得大

而成力柱常車肋欲得密肋骨欲得大而張張而髀骨欲得

出僂骨上出背脊骨上也易牽則易使難牽則難使泉根不用

多肉及多毛泉根莖所出也懸蹄欲得橫如八陰虹屬頸行千

里陰虹者雙筋白尾尾骨屬頸陽鹽欲得廣陽鹽者尾當陽鹽中

間脊骨欲得窄窄則雙臂不常有似鳴者有黃

酉陽雜俎牛三歲二齒四歲四齒五歲六齒六歲以後每

歲接骨脊一節

牛嘗夜鳴者腹有寶也曝之烈日中前置盆水使甚渴而不得飲久之則吐其寶色如淡金能穿土木惟以手承

之則不能透過

郎仁寶七修類稿載藥鋪醫書但知牛黃羊哀狗寶而不知馬黑羊哀治翻胃牛黃狗寶治驚癇羊哀形如濕茅紙時或用之狗寶見者亦罕有人得之於狗胞中其形質如鷺卵色白碎之內有文理數十層考之本草未收不知何人用以治疾又翼越集云馬有馬黑在腎間此不特罕見亦罕聞者不知何所用沈石田客座新聞云馬有赭丹凡番兵事急能致風雨突圍而走者蓋有赭丹隨身耳赭丹者馬腹中所產之物用之念呪卽致風雨殆卽馬黑者是

鼈寶生於鼈腹中狀如人形長寸許得之者急嚙臂捉入

便能見地下寶器

酉陽雜俎鼠胆在肝活取則有或云鼠胆極小一有驚恐則散走膜裏驚定復聚取者盆貯沸水上蓋以紙紙上散佈食物鼠來竊食時不覺墮水則胆猶不及破也治目疾神驗

術士有令雄雞生卵法取極壯雄雞一隻閉置籠內勿與雌接籠外則散置羣雞其在籠內者陽精鬱極而生陰陰陽薄薄即能成卵此則戾氣所結顛倒陰陽必干天地之怒聞有試驗之者云其能治目疾

雞卵恒一雌一雄相間而生伏卵時慮有擊聲故遇震雷必以鐵置其巢下埤雅曰伏卵忌鵝聲及轉磨絞車聲

郭璞亦云雞鷺聞磨聲則曠又雞初生必餓之過三晝夜乃穀之不則內閉

說鈴後集母雞無雄而生卵者欲伏雛須取卵向窠內呪之呪云與窠雞打雄如是七遍則日滿雛出其毛羽盡黑否則成鰥

江表傳南郡獻長鳴承露雞南越志雞冠四開如蓮花鳴聲清徹

莊子羊溝之雞三歲爲株相者視之非良雞也然而時勝人者以狸膏塗其頭也註羊溝鬪雞處也株魁帥也雞畏狸膏

以駭雞犀角爲器盛米粟於中雞不敢食又以鷓鴣之血

塗雞首卽伏不能動

南越志高興縣多容雞似雞而五采至則年穰

京房易傳賢者居明夷之世爲時所傷或衆邪在位厥妖

雞生肉

少夫曰雞兩眼旁通可以治耳常有炫術者能以鐵釘釘雞眼眶於樹木之上去之無血飛走如故蓋雞兩眼止隔一膜也

嶠嶺神書取初生犬眼未開而死者以兩鐵鍼插入眼內倒懸戶上七七曰取出以指吠犬不復敢聲指臥犬立斃

狗於交接時以銀器承取其穢水有服毒者以一滴吞之

卽大吐至毒盡而後已雖鶴頂鳩羽不爲害

以蠟黃和膝焚之可以呼鼠見卽仁寶七修類藁又有云
以黑犬血灌蟬三日燒之諸鼠畢集

嶠嶠神書取女人月布裹兔絲子扎縛如兔形於深山曠
野間焚之則數十里內之兔皆集

晉書淳于智能易筮善厭勝之術高平劉柔夜卧鼠嚙其
左手中指以問智智曰是欲殺君而不能當爲君使其
反死乃以朱書手腕橫文後三寸作田字辟方一寸二
分使露手以卧明旦有大鼠伏死於前

張鷟朝野僉載通川界內養獺插雉尾於獺穴前獺不敢
出

鮎食魚而喜竹池宜沉大竹數尺通節掩而取之

畜魚法沙池宜鱖魚土池宜鯖鱖鱸鯉之類有飛魚者善
出水宜畜之辟獺而魚不淪下霧則鯉魴皆飛有鼈則
不去故鼈曰神守池欲淺而向陽環洲使遊中一區深
邃可過冬忌桐油茶餅橄欖芫花雞糞若池穢致浮啞
者碎芭蕉葉於池自止藥毒者宜新水水發有貫魚之
患宜開竇而編竹洩之凡初秧宜小池飼以細米粉風
揚水面令其食盡日可二次俟五六寸可入大池一年
一尺次年二尺陶朱曰二月上旬庚日養鯉易長又取
道中棄胞盆覆之埋池四角魚永不失魮魚烏魚大鮎
皆食魚不可畜烏魚埋土數月得水復活墨子曰端午

取鯉魚子塗蓆上陰乾六旬取置水中糞箕覆之可得
生南海諸郡八九月采魚子著草懸於窰煙上至二月
雷發時以草浸池塘旬日出如蝌斗謂之鮓鱗凡魚春
夏浮而遡流秋冬沒而順流

曹植言鹹水之魚不遊於江淡水之魚不入於海

異物志魚生流水中則背鱗白生止水中則背鱗黑

異物志魚勞則尾赤

述異記龍巢山下丹水中生丹魚有赤光割其血塗足涉
水如履平地

山海經魚之異者漢水多鰲魃之魚狀如覆魃鳥首魚翼
音如磬石是生珠玉滋水出鳥鼠同穴山多如魃之魚

亦生珠玉食水出椒嶺山多鱗鱗之魚狀如牛音如鼃
諸毗之水多滑魚狀如鱣赤背蒼體之水多鱣魚狀如
鯉而六首洩澤之水出獄法山多鰈魚狀如鯉而雞足
食之皆已疣譙水生何羅之魚一首而十身音如犬登

萊濱海處
皆有之

合水多鱣魚狀如鰈蒼文赤尾食之皆已癰

鼉水出涿光之山多鰓鰓之魚狀如鵠而十翼鱗在羽
端音如鵠可以禦火食之不痺來需之水多鯢魚狀如
鮒墨文食者不瞶余澤多珠蟹魚狀如肺而有目六足
有珠食之無癰渠豬之水多豪魚狀如鮪赤喙尾赤羽
食之已癰勞水多飛魚狀如鮒食之已痔又有鰓父之
魚狀如鮒彘身食之已嘔柢山有魚狀如牛陵居蛇尾

有翼在鮭下音如留牛名曰鮭食之無腫疾泚水多芷
魚狀如鮒一首而十身食之不糲註謂反止失氣也郎翼之澤

多赤鱗人面音如鴛鴦食之不疥泚水多箴魚狀如條
喙如箴食之無疫芷湖之水多條魚狀如雞而赤毛三
尾六足四首音如鵲食之已憂決決之水多人魚狀如
鯢四足音如嬰兒食之無凝疾晉水多紫魚狀如條赤
鱗音如叱食之不驕諸懷之水多鮐魚犬首音如嬰兒
食之已狂觀水多文鰩魚狀如鯉而鳥翼倉文而白首
赤喙以夜飛音如鸞雞食之已狂見則大穰陵羊之澤
多冉遺之魚蛇首六足目如馬耳食之不眊可禦凶鯢
魚狀如蟄蜚長距足白而對食之無蠱疾可禦兵驪山

有美棗常有飛魚食之狀如豚而赤文服之不畏雷
水多薄魚狀如鱸一目音如歐餘如之澤多鰭魚羽翼
出入有光黑水多鱖魚狀如鮒而毳毛末塗之水多倮
蟪狀如黃蛇魚翼出入有光四者皆主大旱

神異經江南有吐蚊之鳥塞北有蚊母之草南中有產蚊

之木又江南有小桃紅草

吾常亦謂之醉仙桃婦孺皆識之

生麥田內

結實如桃形椒粒大小中有小蟲二蠢然能動桃熟則
飛乘其將熟時焙乾研末爲傷科聖藥

世稱三足蟾蜍爲希世之物余家舊藏嘗有其腊者形似
蝦蟆而後一足特長額有兩耳色紫長幾三分能治無
名毒於患處磨擦數次其毒卽消治小兒驚癇縛置臍

間少時卽愈燬於兵燹殊不更見也或云以蝦蟇斷其後之一足久則所存者自移於中斯未見蟾蜍之真形也

岫巖神書冬月欲覓蝦蟇當於老桑樹根下掘之可得也岫巖神書言取蝦蟇一個極大而領下紅色者縛四足以火炙之前置清水久則自吐其寶形如皂筴子色作淡黃金渡江海時含於口中便可不沒三山九侯先生法也

萬法歸宗於子月子日子時向子方取雄鼠大者破其內腎中隔膜自成符形如兩已相背屈曲而下又若連書數亞字者以青囊佩之見者皆無忤意

人見蛇交主三年身死

蛇性淫取其精着人身能令其見思

拾遺記昆明國貢漱金鳥飴以真珠飲以龜腦常吐金屑
宮人用飾釵佩以要寵幸又勒畢國貢細鳥大如蠅狀
似鸚鵡聲如鶴音聞數里亦名候曰蟲服之者多爲丈
夫所媚

證類本草蠱蝥蚯蚓二物異類同穴爲雌雄五月五日候
交時取夫婦帶之各相憐愛

淮南萬畢術馬毛大尾親友自絕註云取馬毛大尾置朋
友衣中若夫婦衣中自相憎矣

山海經景山有景與鳥狀如蛇三足四翼食之者不醉列

女傳稱瞽瞍欲醉舜而殺之二女以藥物與舜遂日飲不醉或卽此物

酉陽雜俎南方有冷蛇長數尺色白不螫人執之冷如握冰

小說載蕭註從狄殿前破蠻洞收其寶貨珍異得一龍長尺許云是鹽龍藉以銀盤每鱗中出鹽少許以玉筋撫得和酒飲之可以助陽後因蔡元度就其體舐鹽而龍死

以蝮蛇血着男子下體則暴縮如蠶終身不能人道

吞炭爲啞以炭能焦肺而損氣也驢耳中垢食之亦啞又驢將交姤割其陽以扑人至血殷其人必死

鴿能飛行數千里猶識故處波斯船上恒用以寄平安信
西陽雜俎乾鵲知來猩猩知往廣記謂猩猩性喜飲酒與
著屐獵人恒以此致之猩猩見之始而怒詈能知人祖
父名乾鵲喜鵲也

淮南萬畢術犀角駭狐述異記犀角辟塵又林邑國記犀
行過叢林不通便開口露齒前向直指棘林自開

論衡倉兕水獸善覆人舟師尙父於孟津號其衆曰蒼兕
令急渡也

獬豸十二葉應月而生其皮不著塵垢

雞於卦象爲巽巽風也武備志載焚雞毛灰揚之便有風
起

火龜游燄飛語食烟獅子能食火炭風生獸積薪而不然
鴉鳥啄樹而火出却火如雀處火而散烟厭火如獮而
色異火出其口中

龍骨着舌卽粘蚘蛇胆隨擊而應投之水中則旋走不止
麝皮渡水則緊陳藏器曰蚘蛇作膾着醋則捲筋不可
脫

以鶴洩滴石卽能透過如龜溺之穿木

龍腦香着孔雀毛則相綴如磁石之引針琥珀之拾芥
以蛇蛻裏麝能益其香

蟹敗漆人氣破犀

龍易骨蛇蛻皮麋鹿易角蟹易螯說見造化權輿又象退

齒蟬退殼麝退香

鯉乘霧而飛兔望月而孕

淮南子蛤蟹珠龜與月盛衰中秋無月則兔不孕蚌不胎
見後山談叢又雜俎蚌聞雷則痢

蜃蜃噴水爲雹海鯢噴沫爲霧

龍聽以角虬飛以鬚見山海經圖讚

元覽鳳骨黑蛟骨青又鱉血碧鰓血元鳳肉味鱗肉角麋
肉蹄麕肉翼蛟肉環駝肉鞍

鳥鳴春蟲鳴秋獨鳴曉驢鳴夜螻蛄鳴於朝寒蜚鳴於夕
鶴仰鳴晴俯鳴陰鳩雄鳴晴雌鳴陰雞啼早晴晏雨林鳥
以朝嘲水鳥以夜咬

師曠禽經鶴

一作鸛

以怨望又難以真視鶴以潔喉臬以凶

叫鳴以愁嘯

元覽鹿食龜鹿食蛇

禽經鸛飛則蜮沉鵲鳴則蛇結又鵲鳴則蜩止而不行

鵲食獾獾食駸駸食豺豺食駸駸食虎他如元龜食
駢飛鼠斷猿狼蝨喫鶴青腰食虎皆以小制大所謂禽
之制其氣也淮南子

酉陽雜俎燕不入室是井之虛也取桐木刻男女形各一
投井中燕必自來

蝙蝠是鼠食鹽或食燈油所化其禽上應女星兵符祕笈

余見鈔本絕不另見云敵以二十八宿列陣如女星值日則用婦

女散髮持扇號哭而來鋒刃火石皆莫能傷須以燈草
蘸油灑陣內其陣自破

蛇蟠向王鵲巢背太歲燕伏戊己虎奮衝冲

五侯鯖獨獸名似猿而大能食猿猿性喜羣獨性喜特猿
鳴三獨鳴一

狔爲猿屬猿見之則慙伏羣跪於前任其擇取旣又自行
洗伐以供其食此與狻猊食象皆爲物類相制也

猿臂通肩引左則右短引右則左短

羊性淫而狠豬性俚而率鵝性頑而傲狗性險而拙宋平
越長史卞彬語

猿食果而胆甜蜂採棘花而蜜苦見老人對明太祖語

蜂採百花俱置翅間惟採蘭花則拱背入房以獻其君

夷堅志鷓鴣竹鳥皆喜食半夏苗故皆有毒人若嗜此二物必生喉癰惟多飲生姜汁可愈

犬食竹茹則啞食木鼈則死又廬山紀事以苧蔴烏頭和豚肉飼犬則啞

虎食犬而醉貓食薄荷而醉鳩食桑椹而醉鹿食竹葉竹紙而醉郭璞云蛇食茄而醉

鵲啄槐實而結玉於腦麝啖柏葉而結香於臍鹿戴玉而角班魚懷珠而鱗紫

鴨鳥千年爲鳩愈久則愈毒鳥生千年則首如人面

凡山中產鳩之處必有犀獸犀角最能化毒故古人以犀

角爲酒杯唐國史補凡有沙蟲水弩之處必有鸚鵡之鳥及可愈之草

淮南子愛熊而食之鹽愛獺而飲之酒雖欲養之非其道能熊屬也述異記陸居曰熊水居曰能

蜂無王而盡死獠失偶而自刺鴛喪匹則以思死鰥貫其牡則其牡並起而援之物性之善也獺之性殘象之性妬麝之性忌狐之性疑蝟之性鈍物性之惡也

豫章紀山有易腸鼠一月吐易其腸束廣微所謂唐鼠是也

酉陽雜俎妻妾有制則白燕來德及幽隱則比魚至比目魚江南常有味似溪蟹感召之說不盡然也

水經注比翼鳥不比不飛亦鳴歸飛鳴聲自呼此戀鄉之思所化也

毛詩義疏鸛一名負釜一名背竈一名皂君泥其巢一旁謂之含水滿之取魚置池中食其雛若殺其子則一村致災旱

冠鳥性勇帶鳥性仁纓馬性樂

鳥雀尾翼上有肉穴名脂瓶每引嘴取脂以塗翅毛故雨露不能濡濕

羽蟲之螫者鶯燕也毛蟲之螫者熊黃鼠也鱗蟲之螫者龍蛇也介蟲之螫者龜鼈也

壁虎蜈蚣赤小練蛇蝦蟆蜘蛛是爲五毒分具五行之性

合置一器則互相生剋不動不食亦不死江浙等處神像腹中恒有此木匣云神得之則能爲靈異

蠱魚三食神仙字而成脉望形如髮絲爲規循環無端道書言承月映之則規中所見之星神皆現形而下求得其丹遂取脉望斷之則滴水數升和丹共服卽飛昇也螳螂所執之葉可以蔽形蛭蜥影目而出塵沙鼠胆滴耳而愈蠱疾

雜俎度古食蚓按度古江南稱爲螞蝗

莊子濡需者豕蝨也

博物志取蜥蜴以草脂和硃砂飼之待體赤搗碎以點宮人之臂則終身不滅遇男合則落故名守宮

烏鰽魚亦作烏賊魚俗呼蜆脯所吐黑水似墨奸詐之徒用以書券經年而滅

龍骨與蛇骨並投酒醪中酒卽騰躍

壁虎尾觸物卽落猶能跳躍須過五六日方止不動研末傳於肉上肉亦跳躍又燒蝙蝠灰乘熟糝之肉亦能動蟻力最大能舉等身之鐵故外壯家大力丸方用之色白者能蝕銀赤者能蝕銅雞食百蟲獨不食蟻惟穿甲食之

郭憲洞冥記載善苑國有百足蠪殼可熬膠又本草蠪能化漆爲水亦能醒醪

續廣博物志

武進徐壽基桂珪編輯

蕃植

瑶芝英茁靈藥根蟠殊方貢集上苑條攀釋名辨物
多識博觀苟求其故務從所安培溉既易滋茂匪難

志蕃植第十四

山海經草木之異者招搖山臨於西海之上產迷穀樹光
映層霄佩之者不惑卽四照花也石脆之山其草多條
狀如韭白華黑實食之已疥其棗之山有草焉葵木而
杏葉或作楷葉黃華而莢實名曰棃可以已癩癩病也淮南子
艸如葵葉而赤華名曰植楮可以已瘋日狸頭已瘋也

食之不昧大韮之山多糜玉有草葉如榆方莖蒼傷名

曰牛傷其根蒼文服者不厭厭逆氣痛可禦兵有草焉狀如

蕞而方莖黃花赤實其本如藁本名曰荀艸服之美人

色招搖之山有草狀如韭而青華名曰祝餘或作杜茶食之

不饑有草焉其狀如茱白花黑實澤如蓼蓼其名曰葍

草服之不昧符禺之山其艸多條狀如葵而赤花黃實

如嬰兒舌食之使人不惑竹山有草名曰黃蘗狀如檉

葉如麻白華而赤實狀如赭浴之已疥又可以已肘崑

崙之丘有草曰贊草狀如葵味如葱食之已勞牛首之

山有草焉曰鬼草葉如葵而赤莖秀如禾服之不憂陽

華之山其草名諸萸多苦辛狀如櫟實如瓜味酸甘食

之已瘧姑搖之山帝女死焉其名曰女尸化爲萑艸其
葉胥成言葉相重也其華黃實如菟丘服之媚於人少陁之
山有草焉名曰蒨草葉狀如葵而赤莖白華實如蓂莢
食之不愚

拾遺記背明國有搖枝粟其枝長而弱無風常搖食之益
體又有鳳冠粟似鳳鳥之冠食者多力遊龍粟枝葉屈
曲如遊龍有瓊膏粟色白如銀食此二粟令人骨輕有
倒葉麻葉如苣色紅紫亦名紅冰麻食之顏色潔白有
飛明麻葉黑實如玉風吹之如塵亦名明塵麻有延精
麥延壽益氣有昆和麥調暢六腑有輕心麥食者體輕
有涼和麥麴以釀酒一醉累月食之凌冬不寒糲中有

露甘如飴

拾遺記昭帝時有倒生菱一花十葉根浮水面實沉泥裏泥作紫色謂之紫泥菱食之不老有黃渠草焰日如火質甚堅食之焚身不熱

晉文帝大始中外夷獻蔓金苔色如金若螢火之聚宮人有幸者以此燭之照耀滿室著衣襟如火光名曰夜明苔

西京雜記青城縣產虛中棗無核而味酸甘可止瘡卽山海經所載北號山之棗食之不癰者是也

搜神記古嶸山帝之女死化爲怪草其葉鬱茂其華黃色實如兔絲服之者恒媚於人按此卽山海經之菑草也

一統志焉鄖縣天心山有薇蕨草風至不偃無風自搖夫
婦佩之則相愛

魏明帝時有合歡草晝則眾條扶疎夜乃合作一莖

滇中普洱府產紫米碎顆蒸之其粒復續亦名接骨米見
雲南通志

騰越州志相思草一名合歡又名低頭見婦女則花葉下
垂取以饋夫夫輒爲婦所制

紅荳亦名相思子李善云其實赤如珊瑚是也徐氏筆精
則以嶺南閩中有相思木歲久結子色紅如大荳故名
相思子每一樹結子數斛又桂海虞衡志則以爲紅荳
蔻花叢生葉瘦如碧蘆春末發初開花先抽一幹有大

稗包之稗解花見一穗數十藥淡紅色蕊重則下垂如
葡萄又如火齊此花無實不與草荳蔻同種每蕊心有
兩瓣相並詞人託興以此資暇集則以爲紅而首烏者
今江陰君山別有紅豆樹實圓而稍扁大如小指而色
紅可愛實必以兩云是相思子

周密癸辛雜志南丹山中有相憐草媚藥也

嚴州有越王竹聞人聲則縮入沙中

安南有菜暮生水上市人過池中以手指之云爾羞否卽慙
悴失色待其人去漸青如初又俗以紫薇花爲畏癩花
以手搔其根花卽搖動

胡曼草誤食之數日卒死採取時須以物投之曰我買你

然後取之則無恙

抱朴子松枝千年爲茯苓萬歲則其上生小木狀似蓮花
名曰威喜芝夜視有光持之甚滑燒之不然帶之辟兵
以帶雞而雞以他雞十二頭共籠之去十二步射十二
箭他雞皆傷帶威喜芝者獨不傷也

胥邪之樹高十尋葉在其末異物志云實大如瓠繫在顛
若挂物實外有皮中有核如胡桃核裏有膚厚半寸許
如猪膏裏有汁斗餘清如水味美於蜜見史記司馬相
如傳注

晉書慎肅氏傳有樹名雒常若中國有聖帝代立則其木
生皮可衣

魏書高昌傳有草名羊刺其上生蜜而味甚佳

鶴草蔓生其花麴塵色淺紫葉如柳而短當夏開花影如飛鶴嘴翅尾足無所不備出南海云是媚草上有蟲老蛻爲蝶赤黃色女子藏之謂之媚蝶能致其夫憐愛草木狀言吉利草莖如金釵股形類石斛根類芍藥交廣多蓄蠱毒惟此草解之極驗

毒草產滇中堂郎山華陽國志云盛夏之月飛鳥過之輒墮武備志所稱醺虎藥傳箭鏃以射人血濡綫無不立死者卽此獵戶張窩亦恒用之謂之見血封喉

五嶺之間多楓木歲久則生瘤瘿一夕遇暴雷驟雨其樹贅暗長三五尺謂之楓人越巫取之作術有神通之驗

取之不以法則能化去

荆富浦有杜荊樹指病自愈取節不相當者月暈時刻之
與病人身齊等置牀下雖危困亦愈以上三則均見稽
含草木狀

任昉述異記秦趙間有相思草狀如石竹而節節相續一
名斷腸草亦名愁婦草是戰國時有思婦死後其墓上
所生者

拾遺記稱背明國有紫菊謂之曰精一莖一蔓延及數畝
味甘食者至死不飢渴焦茅高五丈燃之成灰以水灌
之復成茅亦謂之靈茅有黃渠草映日如火其堅韌若
金食者焚身不熱又瀛洲有樹名景木日中視之如列

星萬歲一實實如瓜青皮黑瓢食之骨輕上如華仙以辟風雨又有草如菖蒲食葉則醉餌根則醒

滇中有木曰金剛纂狀如棕櫚枝幹屈曲而無葉剉以清水暴牛羊於日中使渴而飲之食其肉者必死其地之土司恒用以殺其君長見泳化續編按一統志其花黃而細形類雞冠談叢云幹如珊瑚多刺色深碧

述異記桂林有睡草見之則令人睡一名醉草亦呼爲嬾婦箴

拾遺記石渠之樹千年一花又齊民要術思惟之樹一年三花

顏師古大業拾遺記洛陽進合蒂花時駕輦適至因以迎

輦名之其花外殷紫內素藥粉心深紅跗爭兩花枝幹
烘翠類通草無刺葉圓長薄其香氣穠馥或惹襟袖移
日不散嗅之令人不多睡

劉恂嶺表錄異記沙箸生海岸沙中春吐苗其心若骨白
而且勁可爲酒籌凡欲采者輕步而前及手急援之不
然聞人行聲便縮入沙中推尋之終不可得

酉陽雜俎東海有倒生木此木依山生根在上有人觸則
葉翕人去則葉仍舒

王仁裕開天遺事興慶池南岸有醒醉草人有醉者摘草
嗅之立卽醒悟

彭乘墨客揮犀有困叢生於朽木或糞壤上其形如瑞芝

潔白可愛夜則有光可以鑑物

楊伯昆臆乘思牢竹南番思牢國所產竹質甚澀可以礪指甲

洪箕暘谷後錄有十二時竹者繞節凸生凡子丑寅卯辰

巳午未申酉亥十二字點畫可數

余謂此必於竹生時另用竹木爲模範刻

陰文字於上俟竹節長滿便成陽文

三輔黃圖甘泉谷北岸有槐樹今謂之玉樹楊震關輔古語云耆老相傳咸以爲此卽楊雄甘泉賦所稱玉樹青葱也

談薈筑陽孤竹三年一筍鐵樹六十年一花瀛洲有影木日中視之一葉百影滄洲有强木方一尺重八百斤巨

石繩之終不沉沒上黨有不灰之木焚以石腦油則然
蕉類不一有火蕉者日中視之其未舒之葉皆無影而兩
傍垂翼者有影月中則皆有影燒釘釘之則茂術家厭
勝謂能辟火凡數十年而花數十年而實即鳳尾蕉
羅浮石菖蒲一寸有十二節武功山所產一寸至十五六
節今所種者皆一寸九節也屑瓦栽之則細而短能收
煙明目故案頭恒列之

唐李肇國史補載南中有蚊子樹實類枇杷熟則自裂蚊
乃空殼而去

永昌府瀾滄江外有和合草根潔白結男女交媾狀土人
見之用稻米周遭圍拙方可得不則遁去服之者男視

女雖嫫姆不啻西子王嬙女視男雖醜亦潘安也然載諸江船輒患覆溺不得渡須用長繩繫置岸邊持線登舟渡畢然後引過見柳崖外編

述異記東海龍駒川有島中草名爲龍芻凡馬食之日行千里

風聲木產禹貢因桓之水其實如油麻風吹聲如玉聲因以爲名人有凶者枝則汗有死者枝則折見洞冥記蘭米產東北夷生火中色黑而光其堅若鐵見逸周書萍生於水隔夜則生九子陽數也合而爲十陰數也故其性爲陰中之陽在水時雖烈日曝之不死須覆竹簾竹篩等器使日光從隙中透入然後曬之能死暑夜焚之

三
些
志
爲
水

神農本經水萍勝酒故周禮萍氏謹酒謂萍不溺也

瓊州有知風草叢生土人視其節以占一歲風候每一節則一風無節則無風

木蘭去皮不死卷施去心猶生

嶺表有楓鬼者草類也見雷雨長與樹齊見人卽縮而依舊

郭憲洞冥記鐘火山有明莖草夜如金燈折枝爲炬可見鬼神亦名洞冥草帝令挫此草以藉足履水不沉

蘇鶚杜陽雜編滄洲有金蓮花洲人研之如泥用爲繪彩與真無異

列子冥靈之木生於江南以葉生爲春葉落爲秋五百歲爲春五百歲爲秋

景火山有古雲草二千年一花秣馬則不飢

洞冥記鳳葵草色丹葉長四寸味甘久食之令人身輕肌膚有夢草似蒲色紅晝縮人地夜則出亦名懷夢草懷其葉則夢知吉凶又有女香樹細枝葉婦人帶之其香終年不滅

杜陽編代宗大厯中日林國獻靈光豆大類菉豆其包殷紅而光芒可長數尺和石上菖蒲葉煮之大如鵝卵其中純紫稱之可重一斤啗一丸數日不飢元和八年大較國貢碧麥表裏皆碧香如粳米食之令人體輕久則

可以御風又有紫米有類巨勝炊一升得飯一斗食之
令人髭髮純黑顏色不老

抱朴子龍僊芝狀似升龍之相負也以葉爲鱗其根則如
蟠龍服一枝得千歲五德芝狀似樓殿莖方其葉五色
各具而不雜上如偃蓋中有甘露紫氣起數尺參成芝
赤色有光扣之枝葉如金石之音折而續之卽復如故
草芝有獨搖芝無風自動其莖大如手指赤如丹素華
似莧其根有大魁如斗有細者如雞子十二枚周繞大
根之四旁如十二辰也相去丈許皆有細根如白髮以
相連生高山深谷之上其所生左右無草得其大魁末
服之盡則得千歲服其細者一枝百歲可分他人懷其

大根卽隱形欲見則左轉而出之白符芝高四尺似梅
常以大雪而花季冬而實牛角芝生虎壽山及吳坂上
狀似葱特生如牛角長三四尺青色未服樊桃芝木如
昇龍花葉如丹羅實如翠鳥高不過五尺生於名山之
陰東流泉水之上以立夏之候伺之末服盡一株得五
千歲

王明清揮麈後錄道家者流謂蟾蜍萬歲背生神芝出爲
世之嘉祥政和初民間有獻之者表云萬歲蟾蜍聿生
神草本實二物名各一芝或能辟兵或能延壽乃合爲
一體尤特異於百祥

凡行深山空谷中見有車馬狀大如人掌者仙芝也西陽

雜俎五德芝狀如車馬白符芝大雪而華茵芝狀如樓
皆仙品也又仙經云芝種不一凡掘地得形如人手掌
者肉芝也

宋書芝英者王者親近耆老養有道則生

續古今註靈芝一名壽潛一名希夷

漢武內傳西王母云仙藥有太真紅芝草

運斗樞瑤光得陵出黑芝

拾遺記有七色芝生玉梁下其色青光輝耀謂之蒼芝

抱朴子欲求芝草入名山必以三月九月此山開出神藥
之月也勿以山偃日必以天輔時三奇會尤佳出三奇
吉門到山須六陰日明堂之時帶靈寶符牽白犬抱白

雞以白鹽一斗及開山符檄着大石上執吳唐草

或作花

一把以入山山神喜必得之也又採芝及服芝欲得王相專和之曰支干上下相生爲佳此諸芝名山多有之但凡庸道士心不專精行穢德薄又不曉入山之術雖得其圖不知其狀亦終不能得也

仙經云菊花之實食之者仙瑯環記武林人曹昊種菊結實似櫻桃大而形色亦相似爲其隣女周少夫食之而仙自是百里之內菊皆經年不花

宋書謝靈運傳卷柏萬代而不殞伏苓千歲而方知注卷栢伏苓皆仙物

松上結苓則下有茯苓

龜策傳曰雨霽無風夜燒兔絲罩燭而火滅者明卽掘之
下有茯苓

王子年拾遺記凡松樹年久下必有茯苓

春秋說題辭天文以七列精以五故嘉禾之滋莖長五尺
五七三十五神盛故連莖三十五穗以成盛德禾之極
也

宋書嘉禾五穀之長王者德盛則二苗共秀於周德三苗
共穗於商德同本異穗於夏德異本同秀

周時倭人貢鬯草巨鬯三禺之禾一稔二米王者宗廟修
則出

崔駰七依玄山之梨不周之稻陽樸之薑越裳之梅

魏文帝書江表唯長沙有好米上風炊之五里聞香
拾遺記祇因國貢嘉禾一莖盈車

神異經雀芋狀如雀置乾地反濕置濕地反乾飛鳥觸之
墮走獸遇之僵

黃庭注大霍山下有洞臺司命之府也中有神靈瓜食之
心通至玄

洞冥記有龍肝瓜長一尺花紅葉素生於冰谷所謂冰谷
素葉之瓜仙人瑕丘仲得此瓜食之千歲不渴

漢武內傳西王母仙家上藥有空同靈瓜

神仙傳有青燈瓜大如三斗魁玄表丹裏呈素含紅攬之
者壽食之者仙

廣志瓜之所出以遼東廬江燉煌之種爲美有鳥爪有魚瓜

龍蹄獸掌羊髓兔頭皆瓜屬又金釵虎蟠白瓠玄肝素腕並陸機賦中瓜名

草木狀由梧竹吏民家種之長三四尺圍一尺八九分作屋柱出交趾

草木狀雲母竹一節爲船出扶南

異物志有竹曰簞其大數圍節間相去局促中實滿堅強以爲柱棖

盛宏之荊州記天門山角上各生一竹倒垂拂拭謂之天帚

梁簡文修竹賦玉潤桃枝之麗魚腸金母之名

南越志羅浮山第三十一嶺半是巨竹皆七八圍長一二丈葉如芭蕉謂之龍鍾竹

拾遺記有浮筠之幹葉青莖紫子大如珠有青鸞集其上
下有沙礫細如粉柔風至葉條翻起拂細沙如雲霧仙
者來觀而戲焉吹風竹葉聲如鐘鼓之音

異苑建安有簣簣竹節中有人長尺許頭足皆具
會稽縣志公孫竹高不盈尺可爲几案之玩

道書瑤筍千年生一芽

元覽筑陽孤竹三年而一筍南陵金盤之草一歲而一節
述異記漢章帝三年子母筍生白虎殿前時謂爲孝竹羣

臣獻孝竹頌

元覽蘭爲百草之長葵爲百蔬之王

神仙傳康風子服甘菊花栢實散得仙

董子葶薶死於盛夏欵冬花於嚴寒

古今注將離贈勺藥勺藥一名可離相招贈文無文無一
名當歸欲忘人之憂贈丹棘丹棘一名忘憂欲蠲人之
忿贈青裳青裳一名合歡

運斗樞玉衡星散爲菖蒲遠雅頌著倡優則玉衡不明菖
蒲冠環

述異記苔謂之澤葵又名重錢南人呼爲垢草

本草垣衣一名苔邪在屋上曰屋遊石上謂之陟釐

西京雜記樂遊苑自生玫瑰樹樹下多苜蓿一名懷風時人或謂之光風風在其間常蕭蕭然日照其花有光采故名苜蓿爲懷風茂陵人謂之連枝草

述異記懸腸草一名思子蔓南中呼爲離別草

荆山圖徂山縣山下有石牀傍生野薤人往乞者神許則風吹制其分齊隨偃而翦不得過越

詩疏夫須莎也可爲蓑笠

神仙服食經十一月采旁勃旁勃白蒿也白兔食之壽八百年

遁甲開山圖遼東有襄平山多饒鬼目之菜生而有神虎龍蛇大魚守之雲氣覆之食之令人不饑

注氣如龍虎魚蛇之狀

抱朴子千歲松樹四邊枝起上杪不長望而視之有如偃蓋其中有物或如青牛或如青羊或如青犬或如青人皆壽千歲

抱朴子杵

一作楮

木之實之赤者餌之一年老者還少令人

徹視見鬼昔道士梁須年七十乃服之轉更少至年百四十歲能晝夜行及奔馬後入青龍山去

元覽人參千歲爲小兒枸杞千歲爲犬子楓脂千歲爲琥珀

物原古公亶父始接菓木晉王愷始接花卉

木犀接石榴開花必紅苦楝樹上接梅花則成墨梅柿樹接桃枝則爲金桃桃樹接李枝則紅而甘柿子接及三

次則全無核蓮葯投龍甕中經年移種生碧花桑上接
梅花則不酸桑上接李則脆而甘黃白二菊各披去一
邊皮用麻皮札合其花半黃半白穀樹接桑其葉肥大
梨樹接桑其葉脆美楊梅接桑則不酸

觸露不搗葵日中不剪韭劖竹以辰日

羣芳譜載種異菊法收取各種菊花藏於乾細土內覆以
他物勿使凍損爛壞俟清明後取出揉碎聚而種之便
生異色菊花不可名目又種菊之法須於花敗後將枝
幹剪去俟明年三月中分種之四月則折枝插於濕地
上皆可活自生根所謂三分四折枝也又隔年老幹皆
作花但小纔如鷺眼錢如是卽不須再剪更閱一年其

幹漸老而花亦漸大數十年後成樹今山東諸城縣等處有菊樹疑卽是此

金橘藏於棗豆中則經時不壞菊花藏於冬瓜中則經歲不枯

雪爲百穀之精冬季多蓄雪水至春夏播種時以浸稻麥之種能殷實而耐旱見農桑輯要

芒種後壬日或申日種花草皆活見宋周密癸辛雜志

東坡志林載有嫁石榴事賈思勰齊民要術有嫁棗法正月一日日出時反斧班駁椎之名嫁棗注云不椎則花無子而零落也

齊民要術竹性愛向西南引故園東北角種之數歲之後

自當滿園故諺云東家種竹西家治地爲滋蔓而來生也

陳善捫蝨新話東南中花木有北地所無者茉莉花含笑花闊提花渠邪異花之類以性皆畏寒故茉莉惟六月六日種者尤盛

范致明岳陽風土記五月十三日謂之龍生日可種竹齊民要術所謂竹醉日也

埤雅云松樹命根遇石卽成偃蓋沈括夢溪筆談云閩中植荔枝法去其宗根仍火燔令焦復種之以大石抵其根則結實核小如丁香肉多而美

枇杷於花開時以小鑷去其花心則結實大倍於常無核

而味尤甘美

以棟木爲器終久不裂於芒種時聯子密種則駢結如垣
牆有成紫花者其子浸臘水貯甕中至夏月滌器蠅不
敢近取其子晒乾雜冬春米內不生蛀蟲

趙德麟侯鯖錄載竹凡六十年筴復斫而以子種六年而
復瘞以死猫能引過牆防其過則溝之卧芝蔴稗其中
以竹忌也周子充曰以雜糖和土種竹則茂或以麥拌
土宜椎之忌足踏冬宜掘旁行筍則直根遠行挑出筍
時腐草覆之又灌以糞肥壤筍美瘠地質堅簞苦淡三
種入藥節之歧枝者雌也能孕筍

凡木之屈而欲其直者視其不足處以刀剗其膚則氣行

而斲者先至

折枝花用火燔其折處以蜜封之則能耐久海棠花宜縛薄荷其上牡丹花宜用蜜不用水梅花宜用煮肉汁芙蓉花宜用沸湯以葉閉之少頃插荷花於瓶宜先花而後水

以烏賊魚骨釘凡木中則翳

一說河豚魚海鰔蛸皆可

以狗膽解之復

榮大榕樹以蘇木釘其根則死蒲萄以甘草鍼鍼之則死蘇畏人溺野葛畏薤汁鼠莽根畏豆汁柚樹皮納阿魏其中則立乾凡樹離根三尺斧其皮納巴豆數粒則瀉而死

稻以春種以秋成故禾三節麥以秋種以夏成故麥四節

見老人對明太祖語

以龜甲埋桑根下則茂盛不蠹

舊說柳爲列宿之精故着土卽活所謂倒樹之則生橫樹之則生拔而樹之則亦生也又抱朴子言桑爲箕宿之精能助藥力惟燒肉忌用

凡種瓜者不可使觸香氣而尤忌麝香見酉陽雜俎

徐霞客游記曰朱槿之花插地卽活然植之庭左則活庭右則稿其重臺者謂之花上花楊升菴所稱永昌產者是

蘭待女子同種則香故名待女花見採蘭雜誌又見伊世珍瑯嬛記

啣樓神書載取百花子或瓜子於冬季和乾糞極細土硫黃埋於竈旁近水火處俟清明後取出佩於腰際用時掘地作坎實以馬糞澆以清水能作頃刻花結瓜亦可食

以蓮子七粒於尖穎處稍磨損其殼和硫黃乾糞細土納蛋壳中與雞伏七七日用時置碗內以溫水澆之更覆以蓋閱時便生荷葉

以鳳仙花子和梧桐樹子合置一囊佩之種時復用梧桐子劈開納鳳仙子於內種之則花開皆在葉上

種葫蘆於雞蛋壳內復將蛋壳埋土中則結實漸小依此種之二三年後大纔如豆又以尋常葫蘆移接於雞冠

花上則結實皆成紅色

草木樞經載種大葫蘆法方五尺種四本每兩近處用竹片刮其半交合泥封俟其活除去一穗復取兩大本相併如前法又結實時祇存其一兩箇餘皆刺去不復留則一斗之種大可一石

以葦蔴子與長柄葫蘆共煮乘其熟時綿軟將葫蘆長柄繞成一結乾之便如生成

酉陽雜俎葫蘆實時用盆水照之則結者皆圓又種葫蘆宜坑填油麻菜豆葉及爛草一重糞土一重草驢馬豕糞皆可惟以牛糞澆之則苦不可食

種瓠種瓜以片瓦竹箴剗其根納之則多實結瓢時剖藤

跼插巴豆二三日後瓢柔可紐隨去巴豆瓢復鮮活

大清外術生人髮掛果樹枝上飛鳥皆不敢食

橡子落水則生蓮

沈仕林下清錄猿啼之地多蕨每一聲遽生萬莖

花木考無臺樹女人觸之花方開

洞冥記影娥池有女香樹細枝葉婦人帶之香終身不絕

續廣博物志

武進徐壽基桂珩編輯

珍寶

天地靈集山川媚滋猗歟間氣成此瑰奇捐金沉水
投璧在塗殄物可惜矯情匪宜惟虞喪志古有訓辭

志珍寶第十五

爾雅龍珠在額蛟珠在皮蛇珠在口鼈珠在足魚珠在眼
蚌珠在腹又龜珠在壳鼃珠與蜈蚣珠在脊

管子珠者陰之陽也故珠能勝火玉者陰之陰也故玉能
勝水又國語珠足以禦火災則寶之

荀子玉在山而草木潤淵生珠而崖不枯

淮南子水圓折者有珠方折者有玉清水有黃金龍淵有玉英土地各以其類生

漢書王莽傳美玉可以滅瘢

說林魚懷珠而鱗紫鹿帶玉而角班

青珠琅玕如珊瑚瑟瑟碧珠又有紺珠色赤如血卽張說所見者如意寶珠則魚眼睛也見隋書倭國傳至大品璫珠走珠滑珠礫珂珠照乘辟寒記事非盡蚌出

廣東雷州廉州與交趾接壤出珠之所凡千里六池出斷望者上次竹林次楊梅次平山汙泥下矣

西珠出西洋北珠出肅慎東珠豆青白者出東海南珠則今洛浦澶川蚌珠也

宣和遺事載契丹之先有百穴珠一顆大如雞卵上有百穴每穴中常有真珠一顆月圓之夕以珠映之其生珠穴中珠自落下以絳羅盛之每月可得珠百顆

龜珠辟塵蜈蚣珠辟火蛛珠與螺珠皆定風今福建藩庫有定風珠一顆使臣出洋例準攜帶卽螺蛛也

抱朴子玉脂芝生於有玉之山常居懸危之處玉膏流出萬年已上則凝而成脂有似鳥獸之形色無常采率多似山元水蒼玉色亦鮮明如水精

後漢書西南夷傳出虎魄水精光珠注華陽國志曰蘭滄水有光珠穴博物志曰光珠卽江珠也徐衷南方草物狀曰凡採珠常三月用五牲祈禱若祠祭有失則風攬

海水或有大魚在蚌左右蚌珠長三寸半凡二品珠也
元史尙文傳押忽大珠出西域含之可不渴熨面可使目
有光

劉勰文心雕龍蚌病則成珠又新論蚌蛤結病以銜明月
之珠

香玉辟邪見蘇鶚杜陽雜編肅宗以賜輔國者

軟玉光可鑑物屈之則頭尾相就舒之則勁直如繩又拘
弭國有履水珠色黑類漆鐵大如雞卵其上鱗皴其中
有竅持入江海內可行於洪波之上下均見杜陽雜編
日本國之東三萬里有集真島島上有凝霞臺臺上有手
談池池中出玉棋子不由製度自然黑白分明冬溫夏

冷謂之冷暖玉亦見杜陽雜編今岱廟有溫涼玉大圭一玉色稍青上截常涼下截常溫審之其涼者爲玉溫者爲玉之夾石質粗而若木故較玉爲不涼也

杜陽雜編載龍玉生於水中爲龍所寶若投之水必有虹霓出焉虎玉生於巖谷爲虎所寶若以虎毛拂之卽紫氣迸逸而百獸懾伏按龍玉圓虎玉方其徑各五寸光彩凝冷可鑑毛髮

清水珠狀若彈丸色黑而大有光視之潔徹若輕冰若置於濁水中水卽冷然洞徹見張讀宣室志

南墅閒居錄東坡言其祖光祿見大蜂觸蛛網與蜘蛛相齧墮地化石蠻賈曰是破霧珠持行霧中霧卽解散

珠色黯而無光取以飼雞旋卽殺取則其光煥發但不宜久在雞腹

洗珠先用乳浸一宿以益母草然灰淋汁入麩少許絹囊珠而洗之

珠入甘蕉心中一七日取出則新

論衡隋侯以藥作珠精耀如真其法不傳惟端午日埋蜻蛉頭戶下三日作珠見博物志又宋陳襄文昌雜錄以蚌質作圓珠復取大蚌清水盆浸俟大蚌口開而投之頻換清水夜置月中蚌蛤采玩月華數月卽成真珠宋符瑞志王者不以財爲寶則地生珠今江南常熟虞山常產藥珠珠雖小而可入藥

廣記梁武帝遣人入龍宮求得如意珠之下者光照十里
光之所及無風雨雷電水火刀兵諸毒厲驪珠之中者
光照十步光之所及無蛇虺蟲多之毒又有鶴珠鶴之
所生也

孝經援神契神靈滋德百寶用則璣鏡出注大珠也

須彌之山有吠琉璃火不能銷金不能破蓋卽金網石也
宋書明月珠王者不盡介鱗之物則出

抱朴子眞珠徑一寸以上可服服之可以長久酪漿浸之
則皆化如水銀亦可以浮石水蛭窠化之包形馳黃合
之可引長三四尺丸服之絕穀

廣志夫餘地美珠如酸棗

林邑記黃枝州上多明珠雜寶

南越志木難金翅鳥口結沫所成碧色珠也大秦土人珍之

述異記吠勒國去長安九千里在日南人長七尺被髮至踵乘犀象之車乘象入海底取寶宿於鮫人之舍得淚珠則蛟所泣之珠也亦曰泣珠

郭義恭廣志有至圓珠置地終日不停有石珠鑄石爲珠一名朝珠

廣志又言璫珠之次爲走珠走珠之次爲滑珠滑珠之次爲礪礪珠礪珠之次爲官雨珠官雨珠之次爲稅珠稅珠之次爲蔥符珠

下帷短牒力珠如龍眼大含之多力可以挽象尾使之倒行
劉累得一顆于甯封能伏虎豹蛟龍嘗提虎尾立千雉
之城懸虎怒聲聞數里

道備西王母獻穆王雲澤之珠又名却病珠病在心東向
含之肝北腎西肺則俯身向地脾則南無不立愈

集微五鹿充宗贈宏成子衍濟之珠一名記時投之盤中
滾滾不定至一時盡畧定少選成子讀書每以記時不
差一遍

後漢書郡國志注博南有虎魄生地中其上及旁不生草
深者四五八九尺大者如斛削去外皮中成虎魄如升
初如桃膠凝堅成也

神仙傳云松栢脂入地千年化爲茯苓茯苓化爲琥珀琥珀一名江珠今泰山出茯苓而無琥珀益州永昌出琥珀而無茯苓

梁書中天竺傳火齊狀如雲母色如紫金有光耀列之則薄如蟬翼積之則如紗縠之重沓

李玖纂異紀協金石色青以鐵索貫其背垂於海中經夕引出上必有金

寶母形如美石於每月望設壇海邊石上可以集珠寶見祥異記

周密癸辛雜志續集海井形如小桶而無底非竹非木非金非石海舶行海恒苦乏水有此海井但以大器滿貯

海水置此井於水中汲之皆成甘泉

水火鼎各具鼎之半而有三足不可獨立合之則成全鼎
貯水於水鼎之中而以片紙寸木燃火投於火鼎內則
水立沸

一統志云雲南永昌府所產有印紅者寶石之類也方徑
不過數分投水缸中紅光映滿檀萃滇海虞衡志云臨
陣時以嵌冠上則矢石不能及敵人望之如佛頂圓光
率皆驚怖

豪豬牙亦寶石之類取形似而名之也掛於胸前亦如印
紅之可避矢石永昌府亦有之

水藏珠而圓折山蘊玉而騰輝艸木未秋而黃不能作寶

者下有伏藏太古傳有照寶方以硃砂水銀輕粉和牛羊脂作炬燃之可知地下寶物其光散而青者錢也白而如虹者金銀也成五色者玉也赤而有聲者神龍也黑而黯者伏屍也青而光騰者寶劍也

抱朴子亥日稱婦人者金玉也

元中記黃金之氣爲火白金之氣爲雄雞銅鐵爲胡人銅器之精爲馬美玉之氣爲美女載燭金至百斤以上其精爲羊

元中記玉精爲白虎金精爲車馬銅精爲僮奴鉛精爲老婦

地鏡圖夫寶物在城郭上墻之中樹木爲之變視柯邊有

折枝是其候也視折枝所向寶在其方凡有金寶常變作積虵見此輩便脫隻履若屐以擲之若溺之卽得凡藏寶忘不知處以大銅槃盛水著所疑地行照之見人影者物在下也

地鏡圖視屋上瓦獨無霜其下有寶藏

元覽山下有銀上必產蔥下有黃金上必產薤下有銅錫上必產薑草莖黃秀下有藏銅山有積銀上多素霧白澤圖黃金之精名石塘狀如豚居人家使人不宜妻白鼠以昏時見於丘陵之間視所出入中有金

白澤圖絕水有金者精名侯伯狀如人長五尺五綵衣宋書金勝國平盜賊四夷寶服則出

宋書金人王者有盛德則游後池

齊書金車王者至孝則出

孫氏瑞應圖金牛瑞器也王者土地開闢則至

史封禪書殷得金德銀自山溢

禮斗威儀君乘金而黃則黃銀見

瑞應圖王者宴不及醉刑罰中人不爲非則銀甕出

孔融聖人優劣論金之優者名曰紫磨猶人之有聖也

梁書林邑國有山赤色其中生金夜則出飛狀如螢火

拾遺記山有玉者木傍枝下垂謂之寶苗

鄒子珠生於南海玉出於須彌

白澤圖玉之精名曰委然一作委如美女衣青衣見之以桃

戈刺之而呼其名則得之

抱朴子玉可以烏米酒及地榆酒化之爲水亦可以葱漿消之爲粉亦可餌之爲丸亦可燒之爲粉

宋書玉雞王者至孝則至

璧琉離王者不隱過則至

玉英五常並修則見

元圭水泉流通四海會同則出

延禧王者孝道行則至

碧石者玩好之物棄則至

珊瑚鉤王者恭信則見

玉鑿者不汲而滿王者清廉則出以上並見宋書

符瑞志王者不藏金玉則黃銀紫玉見

瑞應圖玉馬者瑞器也王者清明篤賢則至

雒書王者不藏金則紫玉見之深山服飾不踰祭服則玉
英出

宋書大貝王者不貪財寶則出

孝經援神契德至於山陵則出黑丹

宋書雞駭犀王者賤難得之物則出

地鏡圖視有白鼠夜行者其下有藏金

廣志蜂蠆熱而爲琥珀蜻蜒之目瘞而爲青珠

廣志頗梨千歲汞所化瑪瑙鬼血所化

述異記光武時南海獻珊瑚婦人帝命植於殿前謂之女

珊瑚一旦柯葉盛茂至靈帝時樹死

拾遺記炎帝時有石璘之玉號曰夜光以闇投水浮而不滅

拾遺記帝堯在位聖德光洽河洛之濱得玉版方尺圖天地之形又獲金壁之瑞文字炳列記天地造化之始

膠葛舜漁於澤間水中有聲若雷見一玉牌浮出水面取視之其文曰受而禪惟汝彥因名其澤曰雷

竹書紀年舜四十二年元都氏來朝貢寶玉

遁甲開山圖禹開宛委山得赤珪如日碧珪如月長一尺二寸

隋巢子奚祿山壞天錫玉玦於羿遂殘其身

韓子周有玉版特令膠鬲索之文王不與費仲來求予之
是膠鬲賢而費仲無道也

十洲記周穆王時胡獻昆吾割玉刀及夜光常滿盃盃是
白玉之精光明夜照冥夕出盃於中庭以向天比明而
水汁已滿於盃中也

說題辭孔子卒以所受黃玉葬魯城北

嚴助相貝經穆王得大紫貝懸其殼於昭陽觀以消惡霧
述異經南海出蛟綃紗泉先潛織一名龍紗以爲服入水
不濡

拾遺記員嶠山有冰蠶長七寸黑色有角有鱗以霜雪覆
之然後作繭長一尺其色五彩織爲文錦入水不濡以

之投火經宿不燎唐堯之世海人獻之堯以爲黼黻
東哲發蒙記西域有火鼠之布

四公記扶桑之蠶長七尺圍七寸色如金時不死五月八
日嘔黃絲布于條枝而不爲蠶燒扶桑木灰汁煮之其
絲堅韌四絲爲係足勝一鉤蠶卵大如燕雀卵產于扶
桑下齋卵至句麗國蠶變小如中國蠶耳俄而扶桑國
使使貢方物有黃絲三百斤卽扶桑所吐之絲也帝有
金鑪重五十斤繫六絲以懸鑪絲有餘力

四公記南海商人齋火浣布三端杰公遙識之曰此火浣
布也二是緝木皮所作一是續鼠皮所作以詰商人具
如杰公之說因問木鼠之異公曰木堅毛柔是可別也

以陽燧火山陰柘木藝之木皮改常試之果驗

續廣博物志

武進徐壽基桂珪編輯

怪異

山經列圖方物鑄鼎龍據夏庭熊入晉寢豕啼貝邱
類出晉井禳祀曷施倉卒未審苟識厥恒乃不爲信
志怪異第十六

莊子沈有履竈有髻戶內之煩壤雷霆處之東北方之下
者陪阿蛙蠶躍之西方之下者則沃陽處之水有罔象
丘有萃山有藝茝有方皇澤有委蛇委蛇其大如轂其
長如轅紫衣而朱冠惡聞雷車之聲則奉其首而立見
之者殆乎霸

履水神髻灶神阿蛙蠶狀如小兒沃陽豹
頭馬尾罔象大耳長臂萃文身五采夔一

足方皇如虵兩
頭皆神名

韓子涸澤數百歲生慶忌慶忌者其狀若人其長四寸衣黃衣冠黃冠戴黃蓋乘小馬好疾馳以其名呼之可使千里之外一日反報此涸澤之精也涸川之精者生於螭螭者一頭而兩身其形若虵其長八尺以其名呼之可以取魚鱉此涸川水之精也

異苑吳孫皓時臨海得毛人山海經云山精如人而有毛此蔣山精也故抱朴子曰山之精形如小兒而獨足足向後喜來犯人其名曰蛟知而呼之卽當自却耳一名曰超空可兼呼之又或如鼓赤色一足其名曰渾又或如人長九尺衣裘戴笠曰金累又或如龍有五色赤角

名曰飛龍見之皆可呼其名不敢爲害元中記山精如
人一足長三四尺食山蟹夜出晝藏

白澤圖廁之精名曰倚衣青衣持白杖知其名呼之者除
不知其名呼之則死又築室三年不居其中有滿則長
二尺見人則掩面見之有福又其精名忽長七尺見者
有福又築室三年不居其中有小兒長三尺而無髮見
人則掩鼻見之有福火之精名曰必方狀如鳥一足以
其名呼之則去水之精名曰罔象其狀如小兒赤目黑
色大耳長爪以索縛之則可得烹之吉門之精名曰野
狀如侏儒見之則拜以其名呼之宜飲食故澤之精名
曰冕其狀如蛇一身兩頭五采文以其名呼之可使取

金銀故廢丘墓之精名曰無狀如老役夫衣青衣而操杵好春以其名呼之使人宜禾穀故道徑之精名曰忌狀如野人行歌以其名呼之使人不迷故車之精名曰寧野狀如輶車見之傷人目以其名呼之不能傷在道之精名曰作器狀如丈夫善眩人以其名呼之則去故曰之精名曰意狀如豚以其名呼之則去故井故淵之精名曰觀狀如美女好吹簫以其名呼之則去故臺屋之精名曰兩貴狀如赤狗以其名呼之使人目明左右有山石水生其澗水出流千歲不絕其精名曰喜狀如小兒黑色以其名呼之使取飲食三軍所戰精名曰賓滿其狀如人頭無身赤目見人則轉以其名呼之則去

故水石老精名慶忌狀如人乘車蓋一曰馳千里以其名呼之則可使入水取魚巨墓之精名曰狼鬼善與人鬪不休爲桃棘矢羽以鵝羽以射之狼鬼化爲飄風脫履捉之不能化也故市之精名曰問其狀如圉而無手足以其名呼之則去故室之精名曰侯龍狀如小兒長一尺四寸衣黑衣赤幘大冠帶劍持戟以其名呼之則去山之精名夔狀如鼓一足如行以其名呼之可使取虎狼豹故牧弊池之精名曰髡頓狀如牛無頭見人則逐人以其名呼之則去夜見堂下有鬼披髮走物惡之精名曰溝以其名呼之則無咎故溷之精名曰卑狀如美女而持鏡呼之知愧則去也

宋書河精者人頭魚身師曠時所受讖也

管子桓公北伐孤竹未至卑耳之谿忽見有長尺而人物具者冠右祛衣走馬前疾以問管仲管仲對曰臣聞登山之神有俞兒者長尺而人物具焉霸王之興而登山之神見其走馬前疾導也祛衣示前有水也右祛衣示從右方涉也既至卑耳之谿其言果驗

抱朴子山中夜見胡人者銅鐵之精見秦人者百歲木之精並不爲害寅曰有自稱虞吏者虎也稱當路君者狼也稱令君者狸也卯日稱丈人者兔也稱東王父者麋也稱西王母者鹿也辰日稱雨師者龍也稱河伯者魚也已日稱寡人者社中蛇也稱時君者龜也午日稱王

公者馬也稱仙人者老樹也未日稱主人者羊也稱吏者麀也申日稱人君者猴也稱九卿者猿也酉日稱將軍者雞也稱捕賊者雉也戌日稱人稱姓者犬也稱成陽公者狐也亥日稱婦人者金玉也稱神君者猪也子曰稱社君者鼠也稱神人者伏翼也丑日稱書生者牛也

抱朴子水木之精曰游光畢方能呼其名卽不爲害

搜神記諸葛恪爲丹陽太守出獵兩山之間有物如小兒伸手欲引人恪令持去故地則死云此在白澤圖曰兩山之間其精如小兒見人則伸手欲引人名曰僊囊引去故地則死

白澤圖木之精名彭侯狀如黑狗無尾可烹食孫權時陸敬叔爲建安刺史曾見之

積陰錄云六畜相關作人言者皆熒惑下降也宜於北方作坎埋豕犬血以厭之

山中大樹有能語者非樹能語也其名曰雲陽見大蛇著冠幘者名曰升鄉見使人者名曰微呼之皆吉

拾遺記云丹邱之地有夜叉駒跋之鬼能以赤馬腦爲瓶盂及樂器皆精妙輕麗中國人有用者則魑魅不能逢之

夜臥失髻鼠妖也

坟墓之間積陰不乾者下有伏屍

暑月人死聞雷聲則腹裂須以銅鏡或碗水鎮之生人眼
淚滴尸眶中則成僵人與屍抵足卧則尸必變以陰陽
交錯也對面則否尸變者以敗箒拂之則倒僵尸不過
橋爲水氣所阻也

人死成僵皮色淺綠而縐久則生綠毛三百年而成黃毛
五百年而成白毛再五百年而成旱魃食龍腦龍畏之
山海經禹患淫雨召旱魃止之遂不能去旱魃五百年
而成飛天夜叉又五百年而成犼犼則陰極而火生向
海水吹之海亦爲沸

廣東通志順德深山中古樹上有氣縷縷若煙飛鳥過之
皆墜斫之中人狀類凝脂問之不應拂之則笑食之肉

盡潰裂

法苑珠林掘地而得犬名爲犀犬令家富昌尸子曰地中有犬名曰地狼有人名曰無傷夏鼎志曰掘地而得狗名曰賈掘地而得豚名曰祁掘地而得人名曰聚聚無傷也此物之自然無謂鬼神而恠之也

凡物於庚申之日得人血一滴塗之皆能爲祟